

Mañaria-n, 1966-X-23.

Bildu dira: Irigaray, buru, Labayen, San Martin, Erkiaga eta Irigoyen euskaltzaiñak. Andrinua, Arkotxa, Eizmendi, Juan Garmendia, Ziarsolo, Aita E. Barandiaran, Oleaga, Julene Azpeitia, Altuna, Zatarain, Etxaniz, Gereño, Zubikarai, Aresti, Etxeandia, Etxenagusia, Onandia, Kerexeta eta Astiz laguntzailleak.

«Real Academia Gallega»-k Ministerioari egin nahi diogun eskabidearen kopia bat eskatzen digu, beste ainbeste egiteko asmoz. Bialdu bekie entregatzen dugunean.

Batzorde bat izendatu da Ministeriora eskabidea nola bialdu ikus dezan: Lojendio, Arrue, Mitxelena, Jose Migel Barandiaran, Irigoyen, Diez de Ulzurrun medikua, Caro Baroja, Oleaga eta Astiz. Lenbailen eskatu bedi audientzia.

Martin Oyarzabal laguntzaillea il da. Gure dolu miñak ager bitez.

Besterik gabe oi dan otoitzarekin asi eta bukatu da batzarrea.

*Euskaltzainburuordea*

A. IRIGARAY

*Idazlariordea*

ALFONSO IRIGOYEN

Donostian, 1966 XI-25.

Bildu dira: Dassance, buru, Villasante, Satrustegi, Diharce, San Martin, Larzabal, Labayen, Lafitte, Haritschelhar, Lojendio, Irigaray, Arrue, Zavala eta Irigoyen euskaltzaiñak. Altuna, Loidi, Juan Garmendia, Olaizola, Aresti, Arkotxa, Etxaniz, Oleaga, Artola laguntzailleak.

Gereño-k ezin etorria adierazi du.

Aurreko agiriak irakurri dira: abuztu, iraila eta azarokoak. Ontzat artu dira. Azkenekoari Aresti-k ohar bat egin dio eta jarri bedi oraingo ontan. «Lenbailen eskatu bedi audientzia» dion lekuan behar luke «biar bertan eskatu bedi audientzia kartaz». Ortaz aritu da Aresti eta buruzagi baten beharra aipatu du.

Loidi-k izkribu bat ekarri du eta irakurtzera eman du. Euskaltzaindiak betetzen eztituen eginkizunak aipatu ditu eta buruzagi eta beste karguak behar dan bezala ornitzea eskatzen du.

Gobernuari zuzendutako eskabidea oraindik entregatu gabe dago. Buruzagirik eztagoen ezker, Lojendio-ri eskatu zaio firma dezan, azkenengoa bera izan baitzan. Ala egin du. Oleaga Madriletik etorri da eta nola Donostiatik Zaraguetari eskatu zitzaion Ministeriora aurkeztatzea egiteko, berarekin itz egin du eta egunero deitzen ari omen da audientzia noiz izango dan galdezka. Laster ezpaldin badegu egun orren berri, alegiñak egin bitez Irizar-en bidez edo beste nolabait Ministroarekin alkartu gabe entregatzeko.

Domingo Agirre novela saria Dominique Peillen-ek «itzal herrian» titulua duen lanagatik irabazi du.

Gernika sariak onela eman dira:

Ensayoetan:

1. Iñigo Urroz de Heredia-ri «Euskaldun ospetsu batzuen gizatasuna» lanagatik. Izen ori Thalamas Labandibar-i dagokio.
2. Aita Gaizka Barandiaran S. J.-ri «Zugaitz gurgarriek Ixrael-en»-gatik. Ipuietan:

1. Sabino Alonso Ariño-ri «Txomin-en nekaldiak» ipuiagatik.
2. Jose Maria Etxaburu-ri «Maitasunaren arantzak»-gatik.
3. Manuel Ziarsolo «Abeletxe»-ri «Aretxa, ezkuraren semea»-gatik.
4. Jose Antonio Arkotxa-ri «Mielgax-en ipuia»-gatik.

Nola izendatu buruzagia izan da erabili dan jardunaren gaia. Datorren batzarrean egin bedi. Botoak sekretoak izango dira eta izendatua izateko, emandako boto guztien erdiak eta bat gutxienez alde izan behar dira. Lendabiziko botazioan ifork lortzen ezpadu orrenbeste boto, berriz egingo da eta orrela norbaitek atera arte. Batzarrera ezin joan diran euskaltzaiñak poderioa beste bati eman dezaioke are onduz botoak eman ditzan. Norbait izendatua gelditzen baldin bada eta ezin artu badu kargua, zergatik ezin duen esan beharko du eta Euskaltzaindiak bere juzgua emango du eta naikoa arrazoí duen ala ez erantzungo du. Izendapena bi urterako izango da eta denbora orren buruan berriz botoak emango dira eta urte birik bein ala egingo da. Euskaltzain guztiak dira kandidato. Aurreko urteetan buru izanak ere kandidato bezala sartuko dira.

Ilbeltzeko batzarrea Bilbon egin bedi.

Laguntzaille berriak izendatu dira: Patrik Farrel Dublin-ekoa, M. J. Urmeneta, Luis Jauregi, Klaudio Sagarzazu, Jazinto Karraskedo Olarra, Etchamendi, Etcheberri, Idiart, Jose Maria Echaburu, Juan Oñatibia, Telesforo Monzon, Juan Anjel Etxebarria, Franzisko Xabier Kintana, Jose Luis Lizundia, Ramon Saizarbitoria, Ibon Sarasola eta Xabier Lete.

Irigoyen-ek dio Koka Kola-k egin duen sariketarako, azkar erabaki beharra zegoen ezker, Gipuzkoa-ko juraduan Beobide, Zatarain eta Xabier Lete sartu dirala eta Bizkaikoan Irigoyen, Jaime Goenaga eta Joakin Barrutia, egin diguten eskearen arabera.

Xenpelar sarietan parte artzeko bertso papelak bialtzeko epea urtearen azken egunerarte luzatu da.

Lizardi sarirako juradua izendatu da: Aresti, Artola eta Etxaniz.

San Martin-ek eskatu du Kirikiño sarirako ere izendatzea eta bera, Arrue eta Irigoyen sartu dira erabaki dezaten.

Euskaltzaleak Buenos Aires-tik bialdu diguten programa bat artu da. Bertan, abenduaren 3 eta 4-an euskeraren eguna ospatzeko egingo dituzten gauzak aipatzen dira. Pozik artu da.

CCC-k egindako karta irakurri da. Diskoen bidez egiña duten metodoa Gipuzkoa-ko eskola maisuen artean zabaltzeko modu bat billatzeaz.

Haritschelhar aritu da eta esan du Frantzia-ko gobernuaren abuztuko dekretu baten bidez Bordeleko eta Tolosa-ko Unibersidadeetan «lettres modernes» eta «langues vivantes» ataletan estudianteak euskera ar dezaketela bigarren izkuntza bezala eta gero lizeoetan irakatsi. Azaroan beste dekretu bat etorri da Unibersidade orietan komisio bana sortuz irakaskintzako iru mailletan sartzeko euskera, geografía, historia eta artearen historia, azkenengo aukerak Euskalerrikoak eta Bayona-n orien mendeko bat egin da euskerarentzat. Atsegiñez beterik entzun da berri au.

Vicente Saralegi laguntzaillea il da. Gure dolu-miñak ager bezikie etxeokoi.

Oi dan otoi zarekin asi eta bukatu da batzarrea.

*Euskaltzainburuordea*

L. DASSANCE

*Idazlariordea*

ALFONSO IRIGOYEN